

The Makuilongdi Express

Liangmai Daily Newspaper

"Mazibo niu ngamne"



N-genhiu 23 nai released thiumibo Bollywood film 'Chup' hai lepatbo nidkak lung gasu rangkang wangkhin kiujiu bam mine.R. Balki niu director thiubo khatdi Sunny Deol, Dulquer Salmaan, Pooja Bhatt, Shreya Dhanwanthary paliu niu actor thiujui kiubowe

Kadihipiri Football mathen ga Greatest of all time (GOAT) chiujiu siji bambo Lionel Messi hai padih Argentina leng international goal 100th chantang mide. Jamaica nai friendly match New Jersey ga mathenjiu paniu goal 2 chanjiu Jamaica tu 3-0 ga ngamkhai mide.



Zengtung 29 N-genhiu 2022 Kajannai Chiang PO Tamei, Tamenglong Dist. Manipur Vol.01. Issue 8 Page 1

Tacheng matip maira paliu niu lunibo daone. Chiudi kasa maira paliu niu pingthubo se daone. Kadincham 10:24

Luan 36th National Games Ahmedabad ga Narendra Modi niu thainai lepad sune.



The Hindu. Ahmedabad

N-gen. 28: Luan 36th bo National Game 2022 hai Narendra Modi Stadium, Ahmedabad ga thainai Prime Minister Narendra Modi niu lepet khai sunechiujui tacham ga dinne. Siga Union Youth Affairs and Sports Minister Anurag Singh Thakur khatdi tam-tambo dignitaries di wang karen sune chiujiu dinne. Gujarat State ga national Game hai thaimien niu rai kachanbo thiujui khai bowe haisi Chagahiu zengtung 12th katang tadkiu sune. Chamai sang 15 san niu wangjiu tam-tambo mathen hai mathen kiu sune, khatdi thaikum gu National Game niu then majen suang di kachangbo khatdi chamai keng thubo mathen thiu sune chiujiu dinne. Mathen hai Ahmedabad, Gandhinagar, Surat, Vadodara, Rajkot khatdi Bhavnagar chiujiu cities 6 ga mathen hai tadkiu sune,

LNBA-M Centre Church Tamei ga Liangmai Theological Union (Manipur) One Day Seminar cum Meeting bam khai mide



TME. Tamei N-gen. 29: Seminar ga resource person thiukhaibo Rev. Dr. Tunchapbo Sp. President Liangmai Theological Union, Manipur gu One Day Seminar cum Meeting hai LNBA-M Centre Church Tamei ga wiji tadkiu khai mide chiujiu Kadalungbou Newmai, President LTU, niu dinne. Haibo program leng zengniu pabam tam-tam lamsu Theology kati kinmai, kati lumai khatdi Ministry worker dung wang zaokhai ye.

condt. P.2

Autonomous District Council (ADC) election hai thaikum lungki ga tadkiu miraye. CM N Biren.

THJ News Service
N-gen. 29: N-danai S. Kholian Namga "Inauguration and Foundation Stone Laying of Development Projects in Henglep Area" gu program ga tacham lumai khuga Manipur gu Chief Minister niu dinjiu tuhoi delimitation gu report Delimitation Sub-Committee niu pikhangjiu bambosi phui masanbo ngam hai loi wang sulajiu bam mide, haibo phui ngam hai loilu misai 10 ADCs election hai tadkiu maira ye khatdi sibo election lengzeng niu kam mak kasa hinang di


majatbo lung ga kamwang miraye, chiu lusai Tribal Affairs and Hills department niu election gu pating pawan hai chap pat misune chiujiu dinne. Sikhai suibo khatniu Manipur hai Sub-Committee thiujui chamai khang 9 tu khai bam bowe sigasu committee leng UKhrul, Kamjong, Tengnoupal, Chandel, Pherzawl, Churachanpur, Noney khatdi Tamenglong haibo district gu commissioners nai Sub-Divisional Officers dungtu khaijiu bambo we chiujiu dinne.

Naga gu zupou mai aruang lujiu khat thiubo gu tatu somsu khai mide

Ukhrul Times
N-gen. 28: Naga zupou mai wang aruang lujiu n-danai Tagaramphung nam Kangpokpi district ga 'Naga Solidarity Pillar' chiu giak khai bo tatu somkhai mide chiujiu tacham ga dinne. Masuang phungkhai mibo khatdi tuhoi phungjiu bambo United Naga Council (UNC), All Naga Students' Association, Manipur (ANSAM), Naga Women Union (NWU), Naga people's Movement for Human Rights (NPMHR), tribe gu president dung khatdi tam-tam lamsu chamai kakeng wangjiu joukhai jiu MLA L Dikho niu tatu hai lepat khai mide chiujiu tacham ga dinne. Program ga UNC gu president S Kho John niu tacham dinjiu, Naga maira "malum suibo, tamsinbo khatdi chakhuang thiubo maiye". Chiudi karaiga pou-pe mainiu masuang kamoubo kamkhaibo zengniu aliu kadiga aliu chakhang...

condt. P.2

Karingting Lunlung



@@@Khoi soina aki tasai biuraboi, tingsa ramah tingsa lakbu khang weather forecast phuikhe.
###Sia! sikhoi ania Imphal tadtang lakge bah!
@@@Hamai English High School gaye da!

Parasi masibo bangtu tatu khun pachiang nge.

Naga gu zupou mai aruang lujiu....

condt. from P.1



Naga Solidarity Pillar unveiled

tamjiu bambo we, thainai... doulak ge chiujiu dinne. L Dikho niu program ga tacham dinjiu, haisi chaken- chaken maning toujiu bamrabo ngamkam khatle, aliu haiga machun khat bamjiu wangbo we chiujiu dinne. Paniu Naga gu zupou dungtu chakhuang thiukhaibo chamdi dinkhai ye khatdi paniu dinjiu chunchambo hai aliugu pawuat de chiujiu dinne.

Lt.General Anil Chauhan (Retired) tu Chief of Defence Staff (CDS) leng kada khai mide.



PIB. New Delhi N-gen. 28: India Government niu Lt General Anil Chauhan (Retired) PVSM,UYSM, AVSM, SM, VSM tu Chief of Defence Staff (CDS) leng kada khai mide khatdi paniu Secretary to Government of India, Department of Military Affairs di phung jut raye chiujiu tachamga dinne. Pahai tingkum 40 ning changam kamwangjiu pabam wajiuga command thiukhai boewe, Jammu & Kashmir nai North-East India ga kanhang mai tu operations kambo gadi paniu command thiujui kamkhai mibowe. Patu hai Indian Army 11 Gorkha Rifles ga 1981 kum commisioned thiukhai bowe. Pahai 2021 Karamhiu gase retired thiumi bowe sibo suang paniu Indian military gu changam kadibo wajiuga di tienkhai miye. Indiaga ronnang makjiu United Nations Mission thiujui Angola lamdi tadkhai ye. Paniu retired thiumijiu bamdi national security tu kengjiu khakhai jiu bambowe. Pahai award wajiuga di doumi bowe. Pangam kam wajiuga kha padileng kamkhai bo jengniuga di patu hai haikumbo ngam ga malum khai bowe.

Editorial Chunchambo.

Tuhoi aliu Liangmai leng pageng bam kachangbo hai chunchambo hai siye. Namnam ga kadih gu pawan niu phungwang jiu kakeng lam khatniu khat tu npou sajiu khatdi n-man makjiu bambo di hamakge. Election kambo hai kadhipiri ga paman kung chang kungjiu phungwang mibo mathiuniu siye. Karai gara mai khangkhat piu niu chawang thiujui chawang gu lungsiat hangga lungbam niu bowe chiudi chamai niu ningting khangjiu kam kali wangjiu mathiu niu masenbo maitu chawang kadabo zai hai phungwang bowe. Chiudi aliuniu aliu gu franchise hai thinsi makbo gasu khatniu khattu maning kamoubo hai wangmi bowe. Wanglan zisune ADC, haiga di aliu makum mawi lujiu kawibo jaiga anam ga chuncham makra bo siam kam makjiu mathiu chuncham jiu taten thiukhe. Kaibo mania si thinpiubo pajai simaksai siniu atu kam ajamjiu atu kam masa lusuibo keng bamme.

North Korea Missile test kam lan mide



N-gen. 28. North Korea niu n-danai short-range ballistic missiles nia test thiulan mide chiujiu Seoul's military gu tacham ga dinne. Source. The Hindu US gu Vice-President Kamala Harris niu South Korea ga visit thiura suangga haisi Pyongyang's last test kambowe.

condt. from P. 1

"Current Issues in Mission", lamga ladi khaijiu mathiu makhiam thiun cham khai luwe. Haibo madui gasu LTU gu kasanbo office bearers nai executive members lengdi chamai khang 10 tu kada khai lan mide chiujiu dinne. Haibo program ga Liangmai nahdung Theology ga Doctorate Degree loi mimai chamai khang 10 tu felicitation ngam hai LTU President niu kamkhai mide chiujiu dinne.

1. Rev. Dr. Alungbou Newmai (D. Min.)
2. Rev. Dr. Tanliabou Kalengta (D. Min.)
3. Rev. Dr. Absalom Pamai (D. Min.)
4. Rev. Dr. Tunchapbo Sp. (Ph.D)
5. Rev. Dr. Nkhinlakhbou Ringkangmai (Ph.D)
6. Dr. Adibou Moita (D.Min)
7. Dr. Kaikho Wijunamai (D. Min)
8. Dr. Asin Newmai (D. Min)
9. Dr. Aron Thiumai (D.min)
10. Dr. M maisuangdibou (Ph.D)

Kawang mai mathiu tu LNBA-M CCT niu akhi taliu macha mawi khaibi bonai program leng wangmai mathiu tu president niu thonkiubo cham hai poupat khai mide chiujiu dinne.

Mathen Cham



The Hindu

Uefa Nation League mathenjiu bambo hai n-danai Spain nai Portugal mathen jiu Spain Ivaro Morata niu goal chan khai jiu 1-0 gasu Portugal tu ngamjiu semifinal khang mide. Spain, Italy, Croacia khatdi Netherlands paliu hai mahkum Chageehiu 2023 ga semis mathen lan sune.



Weather Forecast Machine at Tamei

Namraining Tamei Hq. leng thiujui Weather Forecast Machine Hamai Tasiiky compound ga n-danai install thiukhai mide chiujiu Hamai English High School gu Principal gu tacham ga dinne.